

Sèntes, stries e eroïnes

L percors culturèl de l'istà a Poza, pissà con l'Istitut ladin, à soscedà enteress e valorisà la cultura locala e la fegura feminina

Lé dò a ruèr a la fin l percors culturèl “Sèntes, stries e eroïnes”, metù a jir chest istà a Poza, tel chèder de “ParoleVistaDolomiti”, dal Comitad Manifestazions de Poza e da l'Istitut Cultural Ladin.

N event caraterisà da la scontrèdes con autores e esperc, che vigni mèrtesc te sala del Consei de Comun de Poza à menà n muie de ghesc e de fascegn a cognoscer aspec particulères de la cultura ladina, leé soraldut a la fegura feminina te desvalives contesc e vardèda da ponc de veduda de la storia, la letadura, l'èrt e l mit. Chest percors à abù n leam artistich stàbol te la mostra “A proposito di Streghe”, coi depenc e dessegnes de Mariano Vasselai ispiré al liber de Italo Giordani sui prozesc a la stries forin Fiem, che é stac metui fora dut istà te Ciasa de Noscia Jent a Poza e

ades i é da poder veder enscin ai 10 de setember tel Museo Ladin a Sèn Jan. La scontrèdes, che à abù n gran suzess de publich, les à abù anter la protagonistes la professora Ulrike Kindl, presidenta de la Comiscion culturala de l'Istitut Ladin, che à avert l'event ai 25 de jujn prejentan l liber “Miti ladini delle Dolomiti. Dolasilla e Ey de net” e en mèrtesc passà l'à portà dant sie ùltim lurier, realisà semper en colaborazion col scrittor Nicola Dal Falco, dat fora da Palombi Editore e da l'Istitut Ladin Micurà de Rù: se trata del secondo volum de la serie dedichèda a la reinterpretazion del zicle epich del “Ream di Fanes”, che chest'outa più avisa tol dant “La Segnores del temp”.

I desvalives apuntamenc fora per l'istà à metù dant anter l'auter i prozesc per strionaria te Fiem

travers i studies storic de Italo Giordani, la fegura de Maria Piaz de Pavarin prejentèda da la storica fodoma Luciana Palla, che à rencurà l liber “Dal Pordoi a Katzenau”, e amò la lejenda del Ream de Fanes, veduda travers i eies de la scritora Brunamaria Dal Lago Veneri, del studios Adriano Vanin e travers l spetàcol multimedial proponet te oratorie de Poza da la ciantarina Susy Rottonara sun tesé de Roland Verra. I apuntamenc de “Sèntes, stries e eroïnes” jirà inant amò en mèrtesc ai 3 de setember con la prejentazion del liber de Fabio Chiocchetti “I Misteri del Cjaslir. Storia di un santo vescovo e di una presunta strega”, e i se serarà sù l mèrtesc dò, ai 10 de setember, con l'antropologh Cesare Poppi che rejonarà de “Il fato delle fate. Madri, Amanti, Streghe”. (lg)



L storich Italo Giordani e l'artist Mariano Vasselai a l'inaudazion de la mostra “A proposito di streghe” con l diretor de l'Istitut Ladin Fabio Chiocchetti e l president del Comitad manifestazions de Poza Edi Croce.